



ԱՐՀՄԻՈՒԹԵՆԱԿԱՆ

ԱՆՑՈՒԴԱՐՁ

Ա մ ս ա գ ի ռ



Հայաստանի արհմիությունների կոնֆերանսիա



Բովանդակություն

01

Ողջույնի խոսք

02

Արևելյան գործընկերության քաղաքացիական հասարակության ֆորումի Գագաթնաժողով

03

Արդյունաբերության աշխատողների արհեստակցական կազմակերպությունների ճյուղային հանրապետական միությունը միացել է UNiTE համաշխարհային արշավին՝ թվային բռնության դեմ

04

Քննարկվել է ֆորմալ զբաղվածության խթանման օրակարգը Հայաստանում

05

ԵՄ – Հայաստան քաղաքացիական հասարակության պլատֆորմի 7-րդ հանդիպում

06

Արհմիությունների դերն աղետներից հետո վերականգնման և աշխատողների պաշտպանության համակարգում

07

«Էքստրակտիվիզմը Ֆրանսիայում և ամբողջ աշխարհում. սոցիալական կարիքները, շրջակա միջավայրի հետ կապված մտահոգությունները և կապիտալիզմի ախորժակը» թեմայով կոնֆերանս Ֆրանսիայում

08

ՀԱՄԿ-ը հյուրընկալել է Արհմիությունների միջազգային կոնֆերանցիայի գլխավոր քարտուղար՝ Լյուկ Թրայանգլին

09

Արհմիությունները միավորում են ուժերը Արևելյան Եվրոպայում, Կենտրոնական Ասիայում և Կովկասում՝ աշխատողների իրավունքները պաշտպանելու համար

10

ՀԱՄԿ-ի տարեվերջյան խորհրդի նիստ

11

Ստորագրվել է ՀՀ տարածքային կառավարման և ենթակառուցվածքների նախարարության և Լեռնագործների, մետալուրգների և ոսկերիչների արհեստակցական կազմակերպությունների ճյուղային հանրապետական միության միջև հուշագիր




Ողջույնի խոսք

«Արհմիութենական անցուղարձ» ամսագիրն արդեն երկրորդ տարին շարունակում է իր գործունեությունը՝ լուսաբանելով և հանրահռչակելով Հայաստանի արհմիությունների կոնֆեդերացիայի (ՀԱՄԿ) կողմից կատարված աշխատանքները: Այս ամսագիրը դարձել է հարթակ, որտեղ ներկայացվում են արհմիութենական առօրյայի կարևոր իրադարձությունները, ծրագրերը և միջոցառումները, որոնք նպաստում են աշխատողների իրազեկմանն ու նրանց աշխատանքային, սոցիալական, տնտեսական և մասնագիտական իրավունքների պաշտպանությանը:

Այսօր, ավելի քան երբևէ, տեղեկացված լինելը կարևոր է, և մենք շարունակում ենք մեր գործն՝ ամրապնդելով արհմիութենական շարժումը Հայաստանում և տարածելով տեղեկատվություն:

Արևելյան գործընկերության քաղաքացիական հասարակության ֆորումի Գագաթնաժողով



2025թ. դեկտեմբերի 2-4-ը Բրյուսելում անցկացվել է Արևելյան գործընկերության քաղաքացիական հասարակության ֆորումի Գագաթնաժողովը, որին մասնակցել են քաղաքացիական հասարակության ավելի քան 250 ներկայացուցիչներ և որոշում կայացնողներ ԵՄ-ից և Արևելյան գործընկերության երկրներից:

Գագաթնաժողովի մոդերացիան այս տարի ևս վստահվել էր ՀԱՄԿ-ի նախագահ, ԱԳ ԶՀԿ ֆորումի 5-րդ աշխատանքային խմբի համակարգող և ֆորումի մշտական հանձնաժողովի անդամ Էլեն Մանասերյանին, ով հանդես է եկել ելույթով: Ֆորումին հատուկ ելույթով հանդես է եկել նաև ՀՀ ԱԳ նախարար Արարատ Միրզոյանը:

Քաղաքացիական հասարակության գագաթնաժողովի նպատակն էր սահմանել տարածաշրջանային համագործակցության օրակարգ Արևելյան գործընկերության հիմնական առաջնահերթությունների շրջանակներում կարևորագույն թեմաների շուրջ, ներառյալ՝ ժողովրդավարական և հասարակական դիմադրողականությունը, կայուն տնտեսական զարգացումը, անվտանգությունը և տարածաշրջանային կապակցվածությունը: Միջոցառումը ապահովել է բարձր մակարդակի տեսանելիություն տարածաշրջանում քաղաքացիական հասարակության կազմակերպությունների (ԶՀԿ) կողմից իրականացվող աշխատանքին:

Միջոցառումը դարձել է ԶՀԿ-ների, Արևելյան գործընկերության երկրների կառավարությունների, ԵՄ անդամ պետությունների և ԵՄ ինստիտուտների միջև երկխոսության հարթակ:



Արդյունաբերության աշխատողների արհեստակցական կազմակերպությունների ճյուղային հանրապետական միությունը միացել է UNiTE համաշխարհային արշավին՝ թվային բռնության դեմ

IndustriALL համաշխարհային միության անդամ Արդյունաբերության աշխատողների արհեստակցական կազմակերպությունների ճյուղային հանրապետական միությունը միացել է UNiTE արշավին՝ նպատակ ունենալով վերացնել կանանց և աղջիկների նկատմամբ թվային բռնությունը: Այս քայլով արհմիությունները վերահաստատում են իրենց հանձնառությունը՝ պայքարելու աշխատանքի աշխարհում ամենաարագ աճող և լուրջ մարտահրավերներից մեկի դեմ:

Դեկտեմբերի 4-ին ճյուղային միությունը կազմակերպել է հանդիպում-սեմինար, որին մասնակցել են 19 անդամ արհմիությունների ներկայացուցիչներ: Միջոցառման նպատակն էր բարձրացնել իրազեկվածությունը, խթանել փորձի փոխանակումը և քննարկել աշխատողների վրա թվային բռնության ազդեցությունը: Հանդիպման ընթացքում ընդգծվել է, որ թվային բռնությունը՝ ներառյալ առցանց ոտնձգությունները, սպառնալիքները, անցանկալի հաղորդագրությունները և անձնական տվյալների չարաշահումը, գնալով ավելի լայն տարածում է ստանում:

Ճյուղային միության նախագահը նշել է, որ անվտանգ աշխատանքային միջավայրի ապահովումը թե՛ առցանց, թե՛ անցանց արհմիությունների հիմնական և անբաժան պարտականությունն է: Քանի որ թվային հարթակները դարձել են աշխատանքի կազմակերպման և հաղորդակցության կենտրոնական բաղադրիչ, աշխատողների պաշտպանությունը թվային սպառնալիքներից այսօր կարևորագույն պայման է աշխատանքային իրավունքների լիարժեք ապահովման համար:

Հանդիպման առանցքային թեմաներից մեկն Աշխատանքի միջազգային կազմակերպության թիվ 190 կոնվենցիան էր, որը Հայաստանի կողմից վավերացվել է սեպտեմբերին և կարևոր քայլ է աշխատավայրում բռնության և ոտնձգությունների վերացման ուղղությամբ: Ընդգծվել է, որ ԱՄԿ թիվ 190 կոնվենցիայի արդյունավետ իրականացումը պահանջում է համատեղ և համակարգված աշխատանք կառավարության, գործատուների և արհմիությունների միջև՝ ներառելով ներքին քաղաքականությունների բարելավում, իրազեկման միջոցառումներ և մատչելի ու վստահելի հաշվետվությունների մեխանիզմների ստեղծում:

UNiTE համաշխարհային արշավի շրջանակներում ճյուղային միությունը նախատեսում է շարունակել իրազեկման միջոցառումները, աջակցել քաղաքականությունների մշակմանը, խթանել անվտանգ թվային միջավայրի ձևավորումը և ակտիվ համագործակցել սոցիալական գործընկերների հետ:



Քննարկվել է ֆորմալ զբաղվածության խթանման օրակարգը Հայաստանում

ՀԱՄԿ-ի նախագահի տեղակալ Տիրուհի Նազարեթյանը մասնակցել է սոցիալական գործընկերության շրջանակում Աշխատանքի և սոցիալական հարցերի նախարարության, Հայաստանի արհմիությունների կոնֆեդերացիայի, Գործատուների հանրապետական միության համագործակցությամբ և Աշխատանքի միջազգային կազմակերպության (ԱՄԿ) նախաձեռնությամբ՝ դեկտեմբերի 4-ին կայացած՝ «Հայաստանում ֆորմալ զբաղվածության խթանումը» թեմայով աշխատաժողովին:

Քննարկվել են ֆորմալ և ոչ ֆորմալ զբաղվածության ցուցանիշներին, աշխատաշուկայի պահանջներին և միտումներին, սոցիալական տարբեր խմբերի զբաղվածության խթանման, աշխատուժի պրոֆիլավորմանն ուղղված մի շարք հարցեր:



ԵՄ - Հայաստան քաղաքացիական հասարակության հարթակի 7-րդ հանդիպում

2025 թվականի դեկտեմբերի 5-ին Բրյուսելում տեղի է ունեցել Հայաստան-ԵՄ քաղաքացիական հասարակության հարթակի 7-րդ հանդիպումը: Հանդիպման ընթացքում Հայաստանի ներկայացուցիչները ներկայացրել են օրենքի գերակայության, մարդու իրավունքների և հիմնարար ազատությունների, տրանսպորտի, էներգետիկ համագործակցության, զբաղվածության, սոցիալական քաղաքականության և հավասար հնարավորությունների վերաբերյալ գեկույցներ: Հանդիպման վերջում Հայաստան - ԵՄ քաղաքացիական հասարակության հարթակի անդամներն ընդունել են հռչակագիր:

*Հռչակագրին ամբողջությամբ կարող եք ծանոթանալ՝ հետևելով այս հղմանը.
<https://shorturl.at/AlI5w>*



Արհմիությունների դերն աղետներից հետո վերականգնման և աշխատողների պաշտպանության համակարգում



1988 թվականի դեկտեմբերի 7-ը Հայաստանի Նորագույն պատմության ամենածանր ու ողբերգական էջերից մեկն է: Սպիտակի երկրաշարժը խլել է տասնյակ հազարավոր մարդկային կյանքեր, ավերել է քաղաքներ ու գյուղեր և փոխել է երկրի սոցիալ-տնտեսական իրավիճակը: Այս ողբերգությունից անցել է ավելի քան երեք տասնամյակ, սակայն դրա դասերը շարունակում են մնալ արդիական՝ հատկապես աղետների կանխարգելման, աշխատողների պաշտպանության և վերականգնման գործընթացների կազմակերպման համատեքստում:

Հայաստանի արհմիությունների կոնֆեդերացիան, Շինարարության և շինանյութերի արդյունաբերության աշխատողների արհեստակցական կազմակերպությունների ճյուղային հանրապետական միությունը և Հայաստանի շինարարների միությունը համատեղ կազմակերպել են Սպիտակի երկրաշարժի զոհերի հիշատակի միջոցառում և ֆորում-սեմինար: Նախաձեռնության նպատակն է եղել ոչ միայն հարգանքի տուրք մատուցել երկրաշարժի անմեղ զոհերի հիշատակին, այլև վերաիմաստավորել աղետներից հետո վերականգնման գործընթացներում արհմիությունների և մասնագիտական կազմակերպությունների դերը:

Երեք տասնամյակից ավելի անց ակնհայտ է, որ անհրաժեշտ է վերանայել և ամրապնդել այն համագործակցության ոգին, որը ձևավորվել էր երկրաշարժից անմիջապես հետո: Այդ ժամանակ միջազգային համերաշխությունը, մասնագիտական աջակցությունը և աշխատողների միասնականությունը վճռորոշ դեր են ունեցել առաջին օգնության, վերականգնման և շինարարական աշխատանքների կազմակերպման գործում: Այսօր, երբ աշխարհը բախվում է բնական և տեխնածին աղետների աճող վտանգին, նման համագործակցությունը պետք է վերածվի ինստիտուցիոնալ և կայուն մեխանիզմների:

Միջոցառումները նախատեսված են եղել երկու փուլով: Դեկտեմբերի 7-ին Սպիտակի կենտրոնական հրապարակում տեղի է ունեցել հիշատակի միջոցառում: Այս խորհրդանշական արարողությունը ևս մեկ անգամ հիշեցրել է մասնակիցներին, որ մարդկային կյանքի պաշտպանությունը պետք է լինի յուրաքանչյուր քաղաքականության և զարգացման ծրագրի հիմքում:

Դեկտեմբերի 8-ին Հայաստանի արհմիությունների կոնֆեդերացիայում տեղի է ունեցել ֆորում-սեմինար, որի օրակարգը ներառել է մի շարք առանցքային հարցեր: Զննարկվել են արհմիությունների դերն աղետից հետո վերականգնման գործընթացներում և աշխատողների պաշտպանության համակարգում, ինչպես նաև ժամանակակից սեյսմիկ նորմերն ու չափորոշիչները: Առանձնահատուկ ուշադրություն է դարձվել բնակչության անվտանգության և պաշտպանության համակարգերին արտակարգ իրավիճակների ժամանակ, սեյսմակայուն շինարարության ոլորտում նոր կրթական և հետազոտական նախաձեռնություններին, ինչպես նաև միջազգային փորձի ուսումնասիրությանը և համագործակցության հնարավորություններին:

Սպիտակի երկրաշարժի հիշատակը մեզ պարտադրում է ոչ միայն հիշել անցյալը, այլև պատասխանատու կերպով կառուցել ապագան: Արհմիությունների, մասնագիտական կազմակերպությունների, պետական և միջազգային գործընկերների համատեղ ջանքերը կարող են ձևավորել այնպիսի համակարգ, որտեղ աղետների դեպքում մարդկային կյանքը, աշխատողի արժանապատվությունը և անվտանգությունը կլինեն անվիճելի առաջնահերթություն: Այս նախաձեռնությունը կարևոր քայլ է այդ ուղղությամբ՝ միավորելով հիշողությունը, փորձը և ժամանակակից մոտեցումները հանուն անվտանգ ու կայուն հասարակության:




**«Էքստրակտիվիզմը Ֆրանսիայում և ամբողջ աշխարհում.
սոցիալական կարիքները, շրջակա միջավայրի հետ կապված
մտահոգությունները և կապիտալիզմի
ախորժակը» թեմայով կոնֆերանս Ֆրանսիայում**



Լեռնագործների, մետալուրգների և ոսկերիչների արհեստակցական կազմակերպությունների ճյուղային հանրապետական միության նախագահ Էդուարդ Փահլևանյանը և Հայաստանի արհմիությունների կոնֆեդերացիայի աշխատանքային և սոցիալական իրավունքների պաշտպանության բաժնի իրավաբան Աննա Բարիկյանը մասնակցել են «Էքստրակտիվիզմը Ֆրանսիայում և ամբողջ աշխարհում. սոցիալական կարիքները, շրջակա միջավայրի հետ կապված մտահոգությունները և կապիտալիզմի ախորժակը» թեմայով կոնֆերանսին, որը տեղի է ունեցել 2025 թվականի դեկտեմբերի 10-ին:

Ճյուղային հանրապետական միության նախագահ Էդուարդ Փահլևանյանը մասնակցել է «Հանքարդյունաբերության բնապահպանական խնդիրները» և «Արհմիությունների պահանջները, մարտահրավերները և հեռանկարները» թեմաներով պանելային քննարկումներին:

ՀԱՄԿ-ը հյուրընկալել է Արհմիությունների միջազգային կոնֆեդերացիայի գլխավոր քարտուղար՝ Լյուկ Թրայանգլին



2025 թվականի դեկտեմբերի 10-ին Հայաստանի արհմիությունների կոնֆեդերացիան հյուրընկալեց Արհմիությունների միջազգային կոնֆեդերացիայի (ITUC) գլխավոր քարտուղար Լյուկ Թրայանգլին, ում այցը նպատակ ուներ խորացնել համագործակցությունը և քննարկել աշխատողների սոցիալական պաշտպանությանը վերաբերող մարտահրավերները:

Պարոն Թրայանգլը հանդիպեց ՀԱՄԿ-ի նախագահ Էլեն Մանասերյանի և ՀԱՄԿ-ի անդամ ճյուղային հանրապետական միությունների նախագահների հետ:

Հանդիպման ընթացքում քննարկվեցին ՀՀ աշխատանքային իրավունքների պաշտպանության մի շարք կարևոր հարցեր, այդ թվում՝ սոցիալական երկխոսության զարգացումը, աշխատողների տնտեսական և սոցիալական երաշխիքների ուժեղացումը, ինչպես նաև արհմիությունների կարողությունների ընդլայնումը:

Քննարկվեց նաև նվազագույն աշխատավարձի ներկայիս ցածր շեմը, որը չի համապատասխանում նվազագույն կենսապահովման ցուցանիշին և շարունակում է մնալ արհմիությունների հիմնական մտահոգություններից մեկը: Հայաստանի արհմիությունների կոնֆեդերացիայի նախագահ Էլեն Մանասերյանը շեշտեց, որ գործող չափը չի ապահովում աշխատողի և նրա ընտանիքի արժանապատիվ կյանքը՝ ընդգծելով, որ սա խորացնում է սոցիալ-տնտեսական անհավասարությունը և նպաստում է երիտասարդների արտագաղթի աճին:

Էլեն Մանասերյանի նախաձեռնությամբ պարոն Թրայանգլը հանդիպեց նաև Աշխատանքի և սոցիալական հարցերի նախարարի տեղակալ Լուսինե Քոչարյանի և Ազգային Ժողովի աշխատանքի և սոցիալական հարցերի մշտական հանձնաժողովի նախագահ Հերիքնազ Տիգրանյանի հետ:

Կողմերը կարևորեցին համագործակցությունը սոցիալական գործընկերության շրջանակներում, օրենքների փոփոխությունները և արհմիությունների դերի կարևորությունը քաղաքականությունների արդյունավետ մշակման գործընթացում, համագործակցությունը՝ աշխատողների իրավունքների պաշտպանության, եկամտային քաղաքականության արդիականացման և երիտասարդության համար արժանապատիվ աշխատանքի հնարավորությունների ընդլայնման ուղղությամբ:

Լյուկ Թրայանգլը բարձր գնահատեց Հայաստանի արհմիությունների կոնֆեդերացիայի հետևողական աշխատանքը՝ նշելով, որ արժանապատիվ աշխատավարձի և աշխատանքի պայմանների բարելավումը պետք է դառնա պետական-սոցիալական քաղաքականության առաջնահերթություն:

Լյուք Թրայանգլը այցելեց նաև «Մելանտե» ՍՊԸ և Արարատ կոնյակի գործարան և հանդիպեց արհմիության ներկայացուցիչների հետ:

Այցի ավարտին պարոն Թրայանգլը և տիկին Մանասերյանը կարևորեցին շարունակական գործընկերությունը՝ նպատակ ունենալով զարգացնել այն մեխանիզմները, որոնք կնպաստեն աշխատողի մասնագիտական կայացմանն ու կայուն աշխատատեղերի ստեղծմանը երկրում:



Արհմիությունները միավորում են ուժերը Արևելյան
Եվրոպայում, Կենտրոնական Ասիայում և Կովկասում՝
աշխատողների իրավունքները պաշտպանելու համար



Արևելյան Եվրոպայի, Կենտրոնական Ասիայի և Կովկասի երկրներում գործող արհմիությունները կանգնած են բազմաբնույթ և խորքային մարտահրավերների առջև՝ սկսած աշխատողների հիմնարար իրավունքների սահմանափակումներից մինչև քաղաքական ու տնտեսական անկայունություն: Այս պայմաններում միջազգային համերաշխությունն ու համատեղ գործողությունները դառնում են ոչ թե ցանկալի, այլ կենսական անհրաժեշտություն: Հենց այս նպատակով IndustriALL համաշխարհային արհմիությունների նախաձեռնությամբ կազմակերպվել է երկօրյա ենթատարածաշրջանային հանդիպում, որի ընթացքում տարբեր երկրների արհմիութենական ներկայացուցիչներ հավաքվել էին փորձի փոխանակման, իրավիճակի գնահատման և ապագա համատեղ քայլերի քննարկման համար: Հանդիպման ընթացքում մասնակիցները քննարկել են աշխատողների և արհմիությունների առջև ծառացած հիմնական խնդիրները: Չնայած այն հանգամանքին, որ տարածաշրջանի շատ երկրներում օրենքով երաշխավորվում են կազմակերպվելու, կոլեկտիվ բանակցությունների և գործադուլի իրավունքները, գործնականում այդ իրավունքների իրագործումը հաճախ խիստ սահմանափակվում է: Արհմիությունները բախվում են բարդ և խոչընդոտող ընթացակարգերի՝ գործադուլի քվեարկության բարձր շեմերի, երկարատև ու անարդյունավետ միջնորդական գործընթացների, ինչպես նաև խիստ ծանուցման ժամկետների հետ: Այս բոլոր գործոնները էապես նվազեցնում են աշխատողների հավաքական գործողությունների արդյունավետությունը: Բացման խոսքով հանդես է եկել IndustriALL համաշխարհային արհմիությունների գլխավոր քարտուղարի տեղակալ Քեմալ Օզկանը, ով վերահաստատել է կազմակերպության հանձնառությունը՝ աջակցելու տարածաշրջանի արհմիություններին:

Նա ընդգծել է անմիջական երկխոսության կարևորությունը: Օգկանը նշել է, որ հանդիպման հիմնական նպատակներից մեկն է պարզել, թե ինչպիսի գործնական աջակցություն կարող է տրամադրել IndustriALL-ը՝ արհմիությունների կարողություններն ամրապնդելու և նրանց դիմակայունությունը բարձրացնելու համար:

Հանդիպման ընթացքում հանդես է եկել ելույթով նաև IndustriALL-ի գլխավոր քարտուղար Ատլե Հյոյենը, ով ընդգծել է, որ արհմիութենական հիմնարար իրավունքների պաշտպանությունը մնում է կազմակերպության գործունեության առանցքային ուղղություններից մեկը: Նա հատուկ ուշադրություն է դարձրել միավորման ազատության և կոլեկտիվ բանակցությունների իրավունքների պահպանմանը՝ համաձայն Աշխատանքի միջազգային կազմակերպության (ILO) թիվ 87 և 98 կոնվենցիաների: Հյոյենի խոսքով՝ ավտորիտար միտումների աճը, գլոբալ կառավարման թուլացումը և գործատուների կողմից կոլեկտիվ պայմանագրերի համակարգված խաթարումը լուրջ սպառնալիքներ են արհմիութենական շարժման համար:

Երկօրյա քննարկումների արդյունքում մասնակիցները եկել են այն եզրակացության, որ միայն համատեղ և համակարգված գործողությունների միջոցով է հնարավոր դիմակայել տարածաշրջանում առկա ճնշումներին: Արհմիությունների միջև փորձի փոխանակումը, կարողությունների զարգացումը և միջազգային կառույցների աջակցությունը դիտարկվեցին որպես աշխատողների իրավունքների պաշտպանության կարևոր գործիքներ:

Այս հանդիպումը ևս մեկ անգամ ցույց է տվել, որ Արևելյան Եվրոպայի, Կենտրոնական Ասիայի և Կովկասի արհմիությունները, չնայած տարբեր ազգային իրողություններին, ունեն ընդհանուր խնդիրներ և ընդհանուր նպատակ՝ պաշտպանել աշխատողների արժանապատվությունը, աշխատանքային իրավունքները և սոցիալական արդարությունը: Այս հանդիպմանը մասնակցել են IndustriALL-ի անդամ Լեռնագործների, մետալուրգների և ոսկերիչների արհեստակցական կազմակերպությունների ճյուղային հանրապետական միության նախագահ Էդուարդ Փահլևանյանը և Արդյունաբերության աշխատողների արհեստակցական կազմակերպությունների ճյուղային հանրապետական միության նախագահ Արիստակես Դանիելյանը:



ՀԱՄԿ-ի տարեկերջյան խորհրդի նիստ



Հայաստանի արհմիությունների կոնֆեդերացիայի (ՀԱՄԿ) 2025 թվականի տարեկերջյան խորհրդի նիստը տեղի ունեցավ դեկտեմբերի 26-ին: Նիստին մասնակցում էին խորհրդի 55 անդամներից 46-ը, որոնք ներկայացնում են ՀԱՄԿ-ին անդամակցող 18 ճյուղային հանրապետական միությունները:

Նիստի ընթացքում ՀԱՄԿ-ի նախագահ Էլեն Մանասերյանը խորհրդի անդամներին ներկայացրեց 2025 թվականի գործադիր կոմիտեի և ՀԱՄԿ-ի գործունեության վերաբերյալ հաշվետվությունը: Նիստի ընթացքում քննարկվեցին անև այլ օրակարգային հարցեր:

Նիստի ավարտին Հայաստանի արհմիությունների կոնֆեդերացիայի անունից հանձնվեցին շնորհակալագրեր Լեռնագործների, մետալուրգների և ոսկերիչների արհեստակցական կազմակերպությունների ճյուղային հանրապետական միության անդամ «ՌՈՒՄԱԼ ԱՐՄԵՆԱԼ» ՓԲԸ-ի արհմիության նախագահ Արամայիս Պետրոսյանը և Կրթության և գիտության աշխատողների արհեստակցական կազմակերպությունների ճյուղային հանրապետական միության Վարդենիսի տարածքի արհմիութենական կազմակերպությունների միության նախագահ Կարինե Ասատրյանը:

Պարգևատրման ժամանակ իր շնորհակալական խոսքում Կարինե Ասատրյանը կարևորեց արհմիութենական աշխատանքի միասնականությունն ու համախմբվածությունը՝ ի նպաստ աշխատող մարդու աշխատանքային իրավունքների պաշտպանության:



Ստորագրվել է ՀՀ տարածքային կառավարման և ենթակառուցվածքների նախարարության և Լեռնագործների, մետալուրգների և ոսկերիչների արհեստակցական կազմակերպությունների ճյուղային հանրապետական միության միջև հուշագիր



ՀՀ տարածքային կառավարման և ենթակառուցվածքների նախարարության և Լեռնագործների, մետալուրգների և ոսկերիչների արհեստակցական կազմակերպությունների ճյուղային հանրապետական միության միջև ստորագրվել է համագործակցության հուշագիր:

Հուշագիրը ստորագրել են ՀՀ ՏԿԵ նախարարի տեղակալ Ասատուր Վարդանյանը և ՃՀՄ նախագահ Էդուարդ Փահլևանյանը:

Հուշագրի նպատակն է խթանել հանքարդյունաբերության և մետալուրգիայի ոլորտներում սոցիալական գործընկերության զարգացումը, նպաստել ոլորտի աշխատողների աշխատանքի և սոցիալ-տնտեսական իրավունքների պաշտպանության արդյունավետ ապահովմանը, ինչպես նաև աջակցել շրջակա միջավայրի պահպանության և էկոլոգիական անվտանգության բարձրացմանն ուղղված միջոցառումների իրականացմանը:

Փաստաթուղթը միտված է նաև զարգացնելու ՀՀ ՏԿԵ նախարարության, ընդերքօգտագործող կազմակերպությունների և ոլորտի աշխատողների միջև համագործակցության արդյունավետ և փոխվստահության վրա հիմնված մեխանիզմները՝ նպաստելով ոլորտի կայուն և պատասխանատու զարգացմանը:

Աղբյուր՝ ՀՀ տարածքային կառավարման և ենթակառուցվածքների նախարարության ֆեյսբուքյան էջ



Հայաստանի արհմիությունների կոնֆեդերացիա

Հասցե՝ Վազգեն Սարգսյան 26/3

Հեռ.՝ +37410 583682

www.hamk.am hamk@hamk.am